



**Nunatsinni sulisoqarniarnikkut sulisussarsiortarnermi aammalu sulisunik atatitsiinnarnissamut pissutsinik Naalackersuisut qulaajaanermik suliaqartitsinissaannik Inatsisartut aalajangiiffigisassaattut siunnersuut. Qulaajaalluni suliap pingaartumik sammissavai inuiaqatigiittut ingerlatsinermi pingaarutillit suliffeqarfiit, soorlu peqqinnissaqarfik, atuarfeqarfiit, inunnik isumaginnittoqarfiit il.il., aamma ilanngullugu saqqummiunneqassapput suut suliniutit ingerlanneqarnersut innuttaasut suliffeqarnermut attaveqarniarnermikkut annaasaqarnissamut aarlerinaatillit pillugit. Qulaajaalluni suliaqarneq kingusinnerpaamik naammassineqarsimalluni Inatsisartunut saqqummiunneqassaaq Inatsisartut 2016-mi ukiakkut ataatsimiinneranni.**

(Inatsisartunut ilaasortat Steen Lyngø aamma Siverth K. Heilmann, Atassut)

(Siullermeenera)

Demokraatini siunnersuuteqartut isumaqatigaagut oqarmata inuiaqatigiinnut ajornartorsiutaasoq sulisussarsiortarneq taamatullu sulisoreersunik atatitsiniartarneq.

Sulisut paarlagaiaannerat sukkavallaaqaaq, kingunerisarpaa ilisimasanik annaasaqarneq aningaasartuuteqarpallaarnerlu, nuunnermut aningaasartuutit allallu eqqarsaatigalugit.

Tamanna tunngavigalugu isumassarsialatsiaarpasippoq qulaajaalluni suliaqartitsinissaq, qaqilerniarlugu sulisussarsiortarnermi sulisooreersunillu atatitsiniarnermi imaannaangissinnaasut aamma ajornartorsiutaasartut. Demokraatini isumaqarpugut qulaajaalluni suliaqartitsinermi qiviarneqassasut nunaqavissut aamma tikisitat, uangut isumarput naapertorlugu sulisut assigiinngitsunik tunuliaqutallit eqqarsaatigalugit unamminartoqarsinnaasarmat.

Naalackersuisut isumaqatigaagut qulaajaalluni sulititsinermi piffissaq eqqaaneqartoq pillugu aamma qilanaarpugut tamanna pillugu nassuiaatip saqqummiunneqarnissaanut Inatsisartut 2016-mi ukiakkut ataatsimiilerpata.

Siunnersuutip Inuussutissarsiortarnermut Ataatsimiititaliami suliareqqinneqarnissaa innersuussutigaarput.